

P

Newspapers

Menu ▾ 'ā_A

Ka Nupepa Kuokoa, Volume I, Number 8, 18 January 1862 — He wahi kaa. [ARTICLE]

[Back](#)

He wahi kaa.

E oluolu paha oe e hai i ko'u wahi kanaenae mauliawa, imua o na kaikamahine maka nohea o kuu one hanau, a me na keiki kane maka palupalu o Honolulu, a me na hoa uhai-aholo o ka naauao, e noho mai la i ka iu o ka la welawela o Lahainaluna, a me o'u hoa e alo mai la i na makani paio o Honolulu, a me o'u mau hoa e noho mai la i ke one kani o Nonohili, a me ka pahapaha o Polihale. Me oukou ko'u wahi kanaenae mauliawa.

Eia ua wahi kaa la. " O kekahi alii e noho ana me Keanu i Puna, a makemake iho la oia e hana i hale nona, a hoouna aku la ia i kona poe kanaka, e pii i ke oki laau,. A i ko lakou pii ana a hiki ma kahi o ka laau oki aku kekahi kanaka, i kapaia kona inoa o Kuhu-hi-hewa, a i ka hina ana o ka laau, ua kekee loa ua laau nei ana i ike ai he pololei. Pela mau kona hana ana a hcea keia ma ka aina i kanaia o Paliuli nana ae la ia i ka aina

mao a maanei; he wahi maikai e ulu ana na mea aī he nui loa, maia, kalo, &c.

Ia ia e hoolai ana i ka nana mao a maanei, lohe aku keia i ke kani hone mai a ka moa, iluna o ka laau, noonoo iho la ua kanaka nei, he kanaka no ka ko keia aina. Homaka aku la keia e hele iwaena o na maia, a me na kalo, e uhi paapu ana ma ua aina nei. A ike ae la keia i ka pala kahuki o ka maia luna, lalau ae la keia, a ai iho la, no ka mea, ua pololi, hele hou aku la keia, aole liuliu, ike aku la keia i kekahi hale e ku mai ana, a aku la keia ma ka puka o ka hale, aia ho elua wale no kanaka, he *elemakule* a he *luahine*.

Ninau mai la ka elemakule ia ia nei, "Mai hea mai oe?" Hai aku la keia, "Mai kai mai nei au." Ninau hou mai ka elemakule ia ia nei, "I pii mai nei oe i ke aha?" Hai aku la ia, "I pii mai nei au i ka laau hale, aua hiki iho nei au i keia aina maikai." Ninau aku la hoi keia i ka elemakule, "Owai koonei haku aina?" Hai mai la ia, "O Mailaulii, ka mea nona ka aina," aia i hea kona hale? Hai mai laua, "Aia iluna i ka lani" Alaila, pau ae la ka lakou olelo ana.

Olelo mai la na elemakule ia ia nei, “**E** komo maloko;” alaila, komo aku la keia, ninau mai na elemakula ia ia nei, “Aole ou pololi?” Hai aku la keia, “He pololi no.” Ai iho la keia a maona, alaila, hoomaka keia e hoi i kai, i kahi o ke alii, a hoea keia iwa-ho o ka ululaau, i nana aku ka hana e a mai ana ka imu; e olo ana ka pihe no ua keiki nei. A hiki keia i kauhale, haiia mai no kona make, olelo aku keia imua o ke alii, no na mea ana i ike ai, no kona pii ana i ka laau hale. A hoapono mai la ke alii ia ia, aole e make, ua pau, me ke aloha ia oukou a pau loa.

Aia no ia aina mauka loa iloko o ka ululaau i kapaia o Panaewa, ua hele wale a ohu i ka hala a me ka lehua, e kipu ana i ka ua noe hau anu o Kaala.

C. WAAKAUHONUA.

Hilo, Dek. 1861.

E like me ke noi o ka nui o ka poe lawe i ke *Kuokoa*, e hoopukaia'ku oia ma ka **POAONO** o kela pule keia pule. Aole ma ka Poakahi e like me ka olelo i hai mua ia.

This article has been automatically clipped from the Ka Nupepa Kuokoa 18 January 1862, organised into a single column, then optimised for display on your computer screen. As a

result, it may not look exactly as it did on the original page. The article can be seen in its original form in the [page view](#).